

Dorre kanpaiak:
dilin, dan...

Bart sua agiri zan mendian
ta uri guziak kanta «*San Juan*».
Jaia gertatzen gaur plazan.

Dorre kanpaiak:
dilin, dan...

San Juan, udearen atean:
suzko-zezena kaleetan,
eguzki-lorak ate-buruetan.

Dorre kanpaiak:
dilin, dan...

Goizaldeko txistu doiñuan,
kalez-kale, erriaren biran
aurrak aintxintxika sokan.

Dorre kanpaiak:
dilin, dan...

Oitura zarren itzalean
eguzki jauna argi egin naian,
...goibel da, lenaren lausoan.

Dorre kanpaiak:
dilin, dan...

Eusko semeak, anaitasunean,
alaiki San Juan egunean.
Illuntzeko Aremaritakoan:

Dorre kanpaiak:
dilin, dan...

Jaia laisterka doa egan,
erri aldarrika: «*San Juan,*
nekez etorri ta bizkor joan!»